

Na osnovu člana 63. stav 3. Zakona o lovstvu („Službene novine Federacije BiH“, broj 4/06), federalni ministar poljoprivrede, vodoprivrede i šumarstva **d o n o s i**

**PRAVILNIK**  
**O OBRASCU POTVRDE O PORIJEKLU DIVLJAČI I NJENIH DIJELOVA I**  
**USLOVIMA POD KOJIM SE MOŽE VRŠITI PREPARIRANJE DIVLJAČI I DRŽANJE**  
**TROFEJA JAVNO IZLOŽENIH U OBJEKTIMA KAO I UPOTREBI MESA DIVLJAČI**  
**U UGOSTITELJSKIM OBJEKTIMA**

**Član 1.**

Ovim pravilnikom propisuju se uslovi pod kojim se može vršiti prepariranje divljači i njenih dijelova, držanje trofeja preparirane divljači javno izloženih u objektima, kao i upotrebi mesa u ugostiteljskim objektima

**Član 2.**

Pod prepariranjem divljači i njenih dijelova podrazumjeva se dermoplastična obrada cijelih primjeraka divljači ili njenih dijelova, štavljenje i obrada krzna divljači te obrada i montaža trofeja divljači.

**Član 3.**

Prepariranjem divljači mogu se baviti fizička i pravna lica koji su registrovana za obavljanje ove djelatnosti.

**Član 4.**

Divljač i dijelovi divljači namjenjeni za prepariranje mora pratiti potvrda (propratnica), i trofejni list, koji su izdani od strane korisnika lovišta gdje je divljač odstrjeljena.

Propratnica za divljač je dimenzija 10,5X15 cm, štampa se na bijelom papiru i ima slijedeći izgled:

- U pozadini propratnice je stilizovani crtež grančice bukve, toniran u zelenoj boji.
- U lijevom gornjem uglu, je mjesto za upis naziva korisnika lovišta i sjedišta korisnika lovišta.
- Slijedi tekst „Bosna i Hercegovina, a potom tekst „Federacija Bosne i Hercegovine“ ispisano velikim slovima u fontu Bookman Old Style, veličina 8, tamnozeleno boje i boldirano.
- U desnom gornjem uglu je mjesto za upis datuma i broja propratnice.
- Ispod toga je naslov: „Propratnica za divljač“ ispisano velikim slovima u fontu Bookman Old Style, veličina 12, tamnozeleno boje i boldirano.
- Ispod toga tekst: „Ulovljenu/kupljenu u lovištu...“ ispisano malim slovima u fontu Bookman Old Style, veličina 10, tamnozeleno boje i boldirano.
- Ispod toga je tabela u koju se upisuje redni broj, vrsta divljači i/ili njenih dijelova, jedinica mjere, količina i eventualne napomene.
- Ispod tabele je tekst:“ Transport divljači i/ili njenih dijelova obavlja lice:..... Prevoznim sredstvom:....., registarskih oznaka:.....Na relaciji od:....do:..... ispisano malim slovima u fontu Bookman Old Style, veličina 10, tamnozeleno boje.
- U donjem lijevom uglu je mjesto za upis dana za koji važi propratnica, u sredini mjesto za pečat korisnika lovišta a u desnom potpis ovlaštenog lica.

Obrazac propratnice za divljač, štampan je uz ovaj pravilnik i čini njegov sastavni dio.

#### **Član 5.**

Fizička i pravna lica koja vrše usluge prepariranja divljači i njenih dijelova dužna su voditi evidencije o prijemu divljači ili njenih dijelova, u koje se unose sljedeći podaci:

- ime i prezime, adresa, broj lične karte lica koje je divljač odstrijelilo;
- vrsta divljači i dio divljači koji se daje na obradu;
- podaci iz potvrde, i trofejnog lista (naziv i sjedište korisnika lovišta, ocjena trofejne vrijednosti, broj i datum izdavanja);
- datum prijema.

Evidencija iz stava 1. ovog člana vodi se u svesci tvrdog poveza sa obrojčanim brojem stranica i ovjerenim od strane organa nadležnog za izdavanje radne dozvole.

#### **Član 6.**

Trofeji divljači mogu se izlagati u javnim objektima (ustanove, poslovni prostori, društvene prostorije, ugostiteljski objekti), samo ako imaju potvrdu, odnosno trofejni list.

Svi trofeji koji su zatečeni u javnim objektima, a nisu evidentirani do dana stupanja na snagu ovog pravilnika moraju se u roku od jedne godine ocijeniti i uvesti u evidenciju trofeja koju će ovjeriti ovlaštena komisija za ocjenjivanje lovačkih trofeja.

Kopija evidencije se dostavlja Lovачkom savezu, ako se radi o kategoriji vrijednih trofeja.

Javno izloženi trofeji moraju biti pravilno obrađeni i uredno održavani.

#### **Član 7.**

Zabranjeno je javno izlaganje dermoplastičnih preparata ptica i sisavaca korisnih za poljoprivredu i šumarstvo, kao i svih vrsta divljači koje su odredbama Zakona o lovstvu trajno zaštićene.

Izuzetak od odredaba stava 1. ovog člana su zbirke dermoplastičnih preparata u muzejima i znanstvenim i obrazovnim ustanovama (škole i fakulteti).

#### **Član 8.**

Sva pravna i fizička lica koja stavljaju u promet meso divljači moraju pored dokaza o zdravstvenoj ispravnosti mesa divljači imati i dokument o porijeklu mesa divljači (propratnica, račun) koji izdaje korisnik lovišta.

#### **Član 9.**

Ugostiteljski i prodajni objekti koji stavljaju u promet meso divljači dužni su na vidnom mjestu istaknuti obavjest o tome.

#### **Član 10.**

Ovaj pravilnik stupa na snagu narednog dana od dana objave u „Službenim novinama Federacije BiH“.

**Broj:** \_\_\_\_\_

**Datum:** \_\_\_\_\_

**MINISTAR**  
**mr.sci. Damir Ljubić**

Prilog: Obrazac Propratnice za divljač i/ili njene dijelove

..... (korisnik lovišta) ..... sjedište	<b>BOSNA I HERCEGOVINA</b>		<b>FEDERACIJA BOSNE I HERCEGOVINE</b>	Datum: ..... Broj: .....
<b>PROPRATNICA ZA DIVLJAČ</b>				
Ulovljenu / kupljenu u lovištu: ..... <span style="float: right; font-size: small;">(naziv lovišta)</span>				
Redni broj:	Vrsta divljači	Jedinica mjere	Količina	Napomena:
1.	Fazan	kljun	2	Zivi primjerci
2.	Zec	komad	6	Ulovljeno
3.	Srna	kg.	12	Meso divljači-smrznuto
4.	Lisica	krzno	20	Neustavljeno-smrznuto
5.				<b>Zaključno sa rednim brojem 4!</b>
6.				
Transport divljači i/ili njenih dijelova obavlja lice: ..... Prevoznim sredstvom:....., registarskih oznaka:..... Na relaciji od:..... do:.....				
Propratnica važi za dan/ dane: .....		<b>M. P.</b>		..... Ovlašteno lice

# OBRAZLOŽENJE

## PRAVILNIKA

### O OBRASCU POTVRDE O PORIJEKLU DIVLJAČI I NJENIH DIJELOVA I USLOVIMA POD KOJIM SE MOŽE VRŠITI PREPARIRANJE DIVLJAČI I DRŽANJE TROFEJA JAVNO IZLOŽENIH U OBJEKTIMA KAO I UPOTREBI MESA DIVLJAČI U UGOSTITELJSKIM OBJEKTIMA

#### I - PRAVNI OSNOV

Pravni osnov za donošenje ovog pravilnika sadržan je u odredbama člana 63. stav 3. Zakona o lovstvu („Službene novine Federacije BiH“ broj 4/06), kojim je propisano da obrazac potvrde o porijeklu divljači i njenih dijelova iz stava 2. ovog člana i uvjete pod kojima se može vršiti prepariranje divljači i držanje trofeja javno izloženih u objektima, donosi federalni ministar.

#### II - RAZLOZI ZA DONOŠENJE PRAVILNIKA

U članu 90. Zakona o lovstvu propisano je da federalni ministar poljoprivrede, vodoprivrede i šumarstva donosi provedbene propise za koje je ovlašten ovim zakonom. Donošenje pravilnika iz oblasti lovstva omogućit će njegovu potpunu implementaciju.

#### III FINANSIJSKA SREDSTVA

U Budžetu Federacije Bosne i Hercegovine nije potrebno obezbjeđivati posebna sredstva za donošenje ovog pravilnika.